



La fin digl onn 2015 han giuvenils da Mustér fatg mams da Nadal e vendiu quels alla populaziun per recaltgar daners da cumprar boxas da musica. L'entschatta digl onn han ils menaders dil local CONS a Mustér astgau cumprar e montar las boxas desideradas.

Sonda, ils 20 da fevrer essan stai da buna cumpignia a Mustér sin la patinera. Dudisch giuvenils han fatg part a quella occurrenza. Il glatsch era curclaus cun neiv aschia ch'ils sperts ein era vegni frenai empau.



Ensemen cun la biblioteca Trun havein organisau sonda, ils 12 da mars, ina prelecziun cun concert. Las giuvnas lumnezianas, Stina Hendry e Flurina Albin han scret il roman da fantasy EMALIO per giuvenils en romontsch sursilvan. Chiara Jacomet da Rabius ha embelliu la prelecziun cun atgnas canzuns. Dus giuvens han gidau a semtgar in pign refrestg pils hospes.



Bugen motivein nus giuvenils da nossa regiun da sepresentar al publicum. Nus savein scuvierer tscheu e leu in talentau giuvenil. Saver promover activitads culturalas fa grond plascher.

Il meins avrel havein menau atras in cuors da babysitting per scolarAs dil scalem superiur cun 21 participontas. Duront treis seras igl avrel ha la menadra dalla canorta d'affons LUMPAZI a Mustér, Lisa Giorgio, dipl. educatura d'affons pigns, ensemen cun Gabriela scolau las giuvnas. Ellas han empriu ils impurtonts pass da svilup ed il know-how da basa da pertgirar pops ed affons pigns. Exercitau ei vegniu co dar guoter ni buglia, midar stratscha e metter a letg. En gruppas ei vegniu dau divers giugs e fatg activitads che fan tschaffen ad affons pigns. In cuntegn fetg impurtont ei stau da far stem sin prighels per saver evitar accidents e co reagiar endretg tier difficultads.





Sonda, ils 14 da matg ha gia per la tiarza ga giu liug a Mustér in di culs pumpiers Sursassiala. Quater giuvens han giu plascher ed han astgau empruar differentas caussas da fiug e fem cul caumpier Gion Tenner e ses gidonters. Il punct culminont ei segir stau d'astgar ir sisum la scala dil niev auto da pumpiers.

Ils 18 da matg havein organisau ina sera publica da referat e discussiun al podi en Sala da cultura a Trun. Il tema ei stau «Suicidi tier giuvenils». Ils suandonts referents: dr. med. Thomas Lechmann, miedi da casa a Mustér, Lucrezia Berther, dalla psichiatria d'affons e giuvenils dal Grischun KJP e Marcus Corai, dalla polizia cantunala Grischuna «prevenziun-criminalitad da giuvenils» han tematisau mintgamai en lur sector quei tema. Il publicum ei staus interessaus ed ha fatg diever da tschentar damondas.



EXPOSIZIUN / AUSSTELLUNG



Cinema dallas Alps

Fotografias da

Lotar Tomaschett

Giuventetgna Cadi vul motivar giuvenils da visitar exposiziuns el contuorn. La primavera ha Lotar Tomaschett, il pedel dalla scola Trun, exponiu fotografias el Museum Sursilvan Cuort Ligia Grischa a Trun. La mesjamna suentermiezdi, ils 25 da matg, ha ina gruppa da dus scolars e duas giuvnas priu peda per far ina viseta. Nus havein astgau admirar fotografias dils cuolms vischinonts ord diversas perspectivas.

Cun Valentina Montalta e Susanne Hafner dalla Fruchtbar Surselva havein organisau ils 2 da zercladur ina sera d'emprander co mischedar drinks senza alcohol a Mustér. Dudisch giuvenils ein separticipai ed han procurau cun anim per frestgs e gustus drinks.



Gia igl atun 2014 ha ina gruppa da giuvenils entschiet a malegiar skizzas per colurar il container sil plaz da termagliar dalla canorta d'affons LUMPAZI a Mustér. Duront la primavera ed igl atun 2015 han divers giuvenils colurar il container. La primavera 2016 ei stau empau stufi da cuntinuar cunquei che l'aura ei buc propi stada favoreivla. Finalmein igl atun 2016 ha il container saviu vegnir finius diltuttatfatg. Duront quei temps ein entuorn 15 differentes giuvenils separticipai a quei project.



El local TALINA a Sedrun havein giu ils 10 da zercladur ina sera d'exercitar da saltar cun Graziella Di Bella, Esther Hendry e Damian Deflorin. Quei ei stau igl exercezi per la finala far la party da finiziun da scola in'jamna pli tard.

Per finiziun dil survetsch da menaders e per saver eruir tgi che fa pil proxim onn da scola vinavon menadra/menader essan nus stai l'entschatta fenadur a magliar pizza el Resort Catrina a Mustér.

Duront il temps da scola ein ils locals da giuventetgna a Surrein, Mustér e Sedrun aviarts mintgamai il venderdis sera. Per giuvenils da Trun purschin nus in transport a Surrein ed anavos. Las menadras ed ils menaders organiseschan mintgamai la sera.

La Pro Juventute Cadi porscha mintga dus onns il pass da vacanzas per scolarAs. Alla fiasta da finiziun ils 6 d'uost essan nus segidai cun mischedar drinks senza alcohol, decorar la bar e rugalar naven.



All'entschatta digl onn da scola viseta la promotura da lavur da GIUVNETETGNA CADI mintgamai las classas dil scalem superiur dallas scolas ella Cadi. Cun ina presentaziun muossa ella allas scolaras ed als scolars nossas purschidas ed animescha els da separticipar a nossas occurrenzas e da visitar ils locals da giuventetgna.



Il sutpassadi nua la staziun a Sedrun ha survegniu in niev mir colurau. La sonda, ils 20 d'uost ein tschun giuvenils sprayers semess alla lavur. Zaconts giuvenils interessai da

Tujetsch ein stai sperasvi per mirar e ver endamen co quei funcziuna da sprizzar in graffiti.

Igl atun havein nus purschiu a giuvenils naven dil scalem superiur ensi il cuors da sedefender cun Martin Bundi a Mustér el Dojo. Duront duas sondas, ils 29 d'october ed ils 19 da november, han 8 giuvenils astgau emprender co sedefender e seriscuder corporalmein e cun plaids en situaziuns difficilas. Era allas giuvnas levan nus porscher il cuors da seriscuder e prevenziun Wen-Do, deplorablamein havein giu mo in'annunzia ed havein aschia buc saviu menar atras il cuors.





Mesjamna, ils 23 da november havein organisau a Danis in cuors da smincar. Tier Claudia Cathomas da Bella Cosmetic han 9 scolaras empriu co tgirar la pial, co schubergiar correct la fatscha e co smincar. Las giuvnas han survegniu cussegliaziun individuala dalla cosmeticra.

La cumissiun dalla lavur da giuventetgna secumpona dils delegai responsabels da mintga vischnaunca dalla Cadi. La geraua da Mustér Madlen Deflorin-Spescha ha abdicau siu post en vischnaunca cun la fin digl onn, aschia ch'ella remetta era il presidi da nossa cumissiun. Bien engraziament ad ella per siu engaschi duront ils siat onns vargai, nus giavischein ad ella cuntentientscha e ventira pil futur.

Cun in sincer engraziel fetg a tuts che sustegnan nus,
per GIUVENTEGNA CADI, Gabriela Cabalzar-Lombriser